



Broj/Број: 01/2a-50-1-2-41/09
Sarajevo/Сарајево, 2.4.2009.godine

ZAPISNIK

41. sjednice Komisije za vanjske poslove Predstavničkog doma Parlamentarne skupštine BiH, održane 31.3. 2009.

Sjednica Komisije počela je u 12 sati. Sjednici su prisustvovali članovi Komisije: Slavko Matić, Milica Marković, Azra Hadžiahmetović, Milorad Živković, Husein Nanić i Sadik Ahmetović, Denis Bećirović i Sefer Halilović.

Sjednici je kratko prisustvovala Azra Alajbegović.

Osim članova Komisije, sjednici su prisustvovali i: Sead Avdić i Alija Muminović iz Ministarstva vanjskih poslova BiH, Miroljub Krunić iz Ministarstva finansija i trezora BiH, Ammar Miraščija iz Ministarstva civilnih poslova BiH, Nenad Klačar iz Ministarstva vanjske trgovine i ekonomskih odnosa BiH i Mirko Šekara iz Ministarstva prometa i komunikacija BiH.

Zapisnik su vodili Merdžana Iglica, sekretar Komisije za vanjske poslove, i Miroslav Stanišić, stručni saradnik u Komisiji za vanjske poslove.

Predsjedavajući Slavko Matić je na početku pozdravio prisutne članove Komisije za vanjske poslove i predstavnike Vijeća ministara BiH.

Na početku sjednice predsjedavajući Slavko Matić predložio je da se zamijeni redoslijed tačaka dnevnog reda iz poziva i da se druga tačka dnevnog reda stavi iza treće tačke. Potom je za 41. sjednicu jednoglasno usvojen sljedeći

DNEVNI RED

1. Usvajanje Zapisnika 40. sjednice Komisije;
2. Davanje mišljenja o saglasnosti za ratificiranje:
 - a) Sporazuma o financiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore za 2007. godinu, na osnovu instrumenta za pretpristupnu pomoć, komponenta II – prekogranična saradnja (resorno ministarstvo: Ministarstvo finansija i trezora BiH);
 - b) Aranžmana između Vijeća ministara BiH i Vlade Republike Koreje vezano za zajam iz sredstava Fonda za unapređenje ekonomske saradnje (resorno ministarstvo: Ministarstvo finansija i trezora BiH);
 - c) Sporazuma o naučnotehničkoj saradnji između Vijeća ministara BiH i Vlade Crne Gore (resorno ministarstvo: Ministarstvo civilnih poslova BiH);

- d) Sporazuma između Kraljevine Belgije i Republike Albanije, Bosne i Hercegovine, Republike Hrvatske, Bivše Jugoslovenske Republike Makedonije, Republike Moldavije, Crne Gore, Republike Srbije i Misije za privremenu upravu UN-a na Kosovu, u ime Kosova, u skladu sa Rezolucijom Vijeća sigurnosti 1244 o privilegijama i imunitetima Sekretarijata Sporazuma o slobodnoj trgovini u Centralnoj Evropi, (resorno ministarstvo: Ministarstvo vanjske trgovine i ekonomskih odnosa BiH);
 - e) Ugovora o izvedbama i fonogramima Svjetske organizacije za intelektualno vlasništvo (resorno ministarstvo: Ministarstvo vanjske trgovine i ekonomskih odnosa BiH);
 - f) Ugovora o autorskom pravu Svjetske organizacije za intelektualno vlasništvo, (resorno ministarstvo: Ministarstvo vanjske trgovine i ekonomskih odnosa BiH);
 - g) Sporazuma između Vijeća ministara BiH i Vlade Republike Bugarske o međunarodnom drumskom prijevozu putnika i robe (resorno ministarstvo: Ministarstvo prometa i komunikacija BiH).
3. Razmatranje Prijedloga zakona o postupku zaključivanja i izvršavanja međunarodnih ugovora radi davanja mišljenja (predlagač: Vijeće ministara BiH);
 4. Razmatranje Orijentacionog radnog plana za vanjske poslove u 2009. godini;
 5. Razmatranje dopunjenog Izvješća o radu Ministarstva vanjskih poslova BiH u 2008. godini;
 6. Razmatranje Plana rada Ministarstva vanjskih poslova BiH za 2009. godinu;
 7. Razmatranje informacije o međunarodnim ugovorima i sporazumima za ratificiranje u 2009. godini (materijal MVP-a BiH);
 8. Izvještaji i materijali pristigli na Komisiju:
 - Zabilješka sa sastanka članova Zajedničke Komisije za evropske integracije PSBiH s Jelkom Kacinom, zastupnikom u Evropskom parlamentu, u svojstvu izaslanika Hansa Gerta Pottinga;
 - Informacije o raspravi o BiH na sastanku Vijeća EU za opće poslove i vanjske odnose, 16.3.2009., u Briselu, (sačinilo MVPBiH)
 1. Pismo Solana – Rehn ministrima vanjskih poslova EU, od 13.3. 2009.;
 2. Zajednička akcija Vijeća EU o imenovanju EUSR-a u BiH;
 - Izvještaj o posjeti ministra vanjskih poslova BiH Svena Alkalaja Alžiru (sačinilo MVPBiH);
 - Zajednički prijedlozi učesnika Okruglog stola "Poboljšanje poštivanja vojno-političkih obveza BiH u okviru UN-a i OSCE-a (materijal Misije OSCE-a u BiH);
 - Pismo ministra vanjskih poslova BiH Svena Alkalaja predsjedniku Narodne skupštine Republike Srpske Igoru Radojčiću.
 9. Tekuća pitanja:
 - Informacija sekretara Komisije o terminima posjeta Estoniji i Švicarskoj.

Ad.1. Usvajanje Zapisnika 40. sjednice Komisije

Nije bilo primjedbi i članovi Komisije jednoglasno su usvojili Zapisnik 40. sjednice.

Ad. 2. a) Davanje mišljenja o saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore za 2007. godinu, na osnovu instrumenta za pretpristupnu pomoć, komponenta II – prekogranična saradnja

Miroljub Krunic iz Ministarstva finansija i trezora BiH rekao je da je Sporazum pripremljen u skladu s važećim procedurama i prijedlog resornog ministarstva je da Komisija da pozitivno mišljenje za njegovu ratifikaciju.

Nakon toga članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. b) Davanje mišljenja o saglasnosti za ratificiranje Aranžmana između Vijeća ministara BiH i Vlade Republike Koreje vezano za zajam iz sredstava Fonda za unapređenje ekonomske saradnje

Miroljub Krnić iz Ministarstva finansija i trezora BiH kazao je da je ovo okvirni sporazum adresiran između Republike Koreje i Bosne i Hercegovine. Odnosi se na sektor zdravstvene zaštite. Kredit je od 50 miliona dolara koji bi se ravnomjerno podijelio za potrebe finansiranja zdravstvenog sektora oba entiteta. Sam aranžman, u pogledu finansijskih uslova, daje relativno povoljan okvir za finansiranje ovih poreba. Rok otplate je 22 godine s pet godina grejs perioda i kamatnom stopom od 1,5 posto.

Nije bilo rasprave i članovi Komisije su, sa sedam glasova "za" i jednim "suzdržanim", dali pozitivno mišljenje Predstavničkom domu u vezi s ratifikacijom ovog aranžmana.

Ad. 2. c) Davanje mišljenja o saglasnosti za ratificiranje Sporazuma o naučnotehničkoj saradnji između Vijeća ministara BiH i Vlade Crne Gore

Ammar Mirašić iz Ministarstva civilnih poslova BiH kazao je da je Sporazum potpisan 1. 12. 2008., prilikom posjete delegacije Vlade Crne Gore Bosni i Hercegovini. Kazao je da od grupe zemalja zapadnog Balkana, već imamo potpisane ovakve sporazume sa Srbijom, Hrvatskom i Albanijom. Sporazumom se reguliraju pitanja vezana za naučnotehničku saradnju i saradnju dvije zemlje u oblasti naučnoistraživačkog rada, zajedničkih projekata, organizacije simpozija, seminara, razmjene iskustava.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. d) Davanje mišljenja o suglasnosti za ratificiranje Sporazuma između Kraljevine Belgije i Republike Albanije, Bosne i Hercegovine, Republike Hrvatske, Bivše Jugoslovenske Republike Makedonije, Republike Moldavije, Crne Gore, Republike Srbije i Misije za privremenu upravu UN-a na Kosovu, u ime Kosova, u skladu s Rezolucijom Vijeća sigurnosti 1244 o privilegijama i imunitetima Sekretarijata Sporazuma o slobodnoj trgovini u Centralnoj Evropi

Nenad Klačar iz Ministarstva vanjske trgovine i ekonomskih odnosa BiH rekao je da je u okviru regionalnog Sporazuma o slobodnoj trgovini CEFTA uspostavljen Sekretarijat čije je sjedište u Briselu, izabran je direktor i prateće stručno i administrativno osoblje. Ovim sporazumom zemlje članice CEFTA-e su s Vladom Belgije potpisale Sporazum kojim se Sekretarijatu CEFTA-e daje međunarodnopravni subjektivitet a Sekretarijatu i osoblju CEFTA-e priznaju imunitet i privilegije identično kao i drugim diplomatskim misijama i diplomatskim predstavnicima u Kraljevini Belgiji.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. e) Davanje mišljenja o saglasnosti za ratificiranje Ugovora o izvedbama i fonogramima Svjetske organizacije za intelektualno vlasništvo

Nenad Klačar iz Ministarstva vanjske trgovine i ekonomskih odnosa BiH rekao je da je obaveza BiH u okviru integracionih procesa da osigura odgovarajući nivo zaštite prava intelektualnog vlasništva na prostoru BiH. U okviru toga BiH je preuzela obavezu da usvoji odgovarajuće zakonodavstvo, da u okviru Sporazuma o stabilizaciji i pridruživanju s EU nivo zaštite intelektualnog vlasništva dovede na nivo kao što je u zemljama Evropske unije. Ovaj ugovor je, u suštini, dopuna Rimske konvencije o zaštiti umjetnika izvođača, proizvođača fonograma i radiodifuznih organizacija. Ovim međunarodnim ugovorima osigurava se zemljama koje pristupe konvenciji pravo nacionalnog tretmana.

Ad. 2. f) Davanje mišljenja o saglasnosti za ratificiranje Ugovora o autorskom pravu Svjetske organizacije za intelektualno vlasništvo

Nenad Klačar je, u vezi s ovim ugovorom, kazao da se njegovim potpisivanjem ulazi u članstvo u Bernsku konvenciju gdje je BiH već članica. Kazao je da se u ovom ugovoru zaštita autorskog prava proširuje na još dvije oblasti a to su zaštita kompjuterskih programa i zaštita baza podataka, te daje mogućnost autorima da vrše distribuciju, iznajmljivanje i javno objavljivanje svojih autorskih radova.

Članovi Komisije jednoglasno su dali pozitivno mišljenje Predstavničkom domu za ova dva ugovora.

Ad. 2. g) Davanje mišljenja o saglasnosti za ratificiranje Sporazuma između Vijeća ministara BiH i Vlade Republike Bugarske o međunarodnom drumskom prijevozu putnika i robe

Mirko Šekara iz Ministarstva prometa i veza BiH kazao je da je ovo jedan u nizu sporazuma koje BiH zaključuje s drugim državama. Ovaj sporazum sklopljen je na bazi reciprociteta i obuhvata prijevoz putnika i robe. Prijevoz robe može biti tranzitni, bilateralni i prijevoz za treće zemlje.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 3. Razmatranje Prijedloga Zakona o postupku zaključivanja i izvršavanja međunarodnih ugovora radi davanja mišljenja (predlagač: Vijeće ministara BiH)

Sead Avdić iz Ministarstva vanjskih poslova BiH rekao je da je postojeći zakon iz 2000. godine stvarao dosta problema u smislu usporavanja euroatlantskih integracija i asocijacija BiH i zaključivanja bilateralnih sporazuma i ratifikacije, deponovanja itd., tako da je bilo potrebno izraditi novi Zakon o postupku zaključivanja i izvršavanja međunarodnih ugovora. U novom zakonu postoji sasvim novi pristup shodno međunarodnom pravu gdje se definiraju pojedini pojmovi pokretanja postupka, pregovaranja, zaključivanja, ratifikacije, potpisivanja, provođenja itd. Kazao je da ovaj prijedlog zakona ubrzava postupak zaključivanja međunarodnih sporazuma, posebno bilateralnih, jer se Ministarstvo vanjskih poslova BiH obavezuje da u roku od 30 dana dostavi sporazum Vijeću ministara BiH na razmatranje i prihvatanje, a Vijeće ministara BiH obavezuje se da Sporazum dostavi Predsjedništvu BiH najkasnije za 60 dana.

Alija Muminović iz Ministarstva vanjskih poslova BiH je, što se tiče ekonomskog aspekta, kazao da je evidentno da nema kvalitetne ekonomske saradnje bez unaprijed reguliranih ugovornih odnosa.

Milorad Živković kazao je da, po njemu, u ovom zakonu nema ništa sporno što se tiče ustavnog osnova i kazao da podržava donošenje ovog zakona s ciljem ubrzavanja procedura donošenja međunarodnih ugovora. On je iznio dvije primjedbe. Prva je da u članovima Zakona nema dosljednosti i to je tehnička ispravka koja se lako može uraditi, a druga je da je potrebno u nekoliko članova Zakona pojasniti odredbe pogotovo u članovima 1. i 4. i najavio da će podnijeti tri amandmana kad Zakon dođe u amandmansku fazu.

Slavko Matić pohvalio je Ministarstvo vanjskih poslova BiH i Vijeće ministara BiH zbog toga što su reagirali na nešto što je Komisija za vanjske poslove zaključila prije godinu dana, a to je da su trenutni važeći akti koji reguliraju način i procedure zaključivanja Sporazuma neadekvatni, zastarijeli i da je potrebno prići izradi novog zakona.

Nakon toga članovi Komisije jednoglasno su donijeli zaključak kojim daju pozitivno mišljenje o principima Prijedloga zakona o postupku zaključivanja i izvršavanja međunarodnih ugovora u prvom čitanju.

Ad. 4. Razmatranje Orijentacionog radnog plana Komisije za vanjske poslove u 2009. godini

Milica Marković dostavila je svoj prijedlog dopune Orijentacionog plana Komisije za vanjske poslove u 2009. godini, a s obzirom da niko od drugih članova Komisije nije dostavio svoj prijedlog, zaključeno je da ova tačka bude i na narednoj sjednici Komisije kada bi se svi eventualno novi prijedlozi objedinili i Komisija o tome izjasnila.

Ad. 5. Razmatranje Dopunjenog izvještaja o radu Ministarstva vanjskih poslova BiH u 2008. godini

Sead Avdić je u okviru ove tačke vratio na prethodnu tačku dnevnog reda i kazao da bi Ministarstvo vanjskih poslova BiH moglo doprinijeti Orijentacionom radnom planu Komisije za vanjske poslove u 2009. godini, predlažući obilaske ministarstva, upoznavanje Komisije sa sektorima i odsjecima Ministarstva vanjskih poslova BiH pa sve do plana putovanja.

U vezi sa 5. tačkom dnevnog reda, Sead Avdić kazao je da je Predsjedništvo BiH odgovorno za vođenje vanjske politike Bosne i Hercegovine. Kazao je da mi još uvijek nemamo jasne podjele nadležnosti na relaciji Parlamentarna skupština BiH, Predsjedništvo BiH i Vijeće ministara BiH i Ministarstvo vanjskih poslova BiH. On je rekao da je Ministarstvo vanjskih poslova BiH, uz Dopunjeni izvještaj, dostavilo i radni materijal pod nazivom: "Strateški pravci razvoja ekonomske diplomatije u Ministarstvu vanjskih poslova BiH", kao i da je Ministarstvo u proteklih šest mjeseci radilo na restrukturiranju Odsjeka ekonomske diplomatije u Sektor ekonomske diplomatije što bi trebalo da unese jednu novu dimenziju u rad Ministarstva vanjskih poslova BiH.

Alija Muminović iz Ministarstva vanjskih poslova BiH je u svom obraćanju kazao da Ministarstvo prihvata sugestije Komisije za vanjske poslove sa sjednice na kojoj je razmatran Izvještaj o radu Ministarstva vanjskih poslova BiH za 2008. godinu i da ih je uzelo u obzir u svom dopunjenom izvještaju. On je kazao da su se pitanja Komisije uglavnom odnosila na ekonomsku diplomatiju, unutrašnje odnose u Ministarstvu vanjskih poslova BiH i popravak imidža BiH u svijetu. Dodao je da je dobar dio primjedbi i sugestija Komisije uvršten u Plan rada za 2009. godinu i s tim u vezi spomenuo prijedlog da Komisija za vanjske poslove posjeti MVP-a i da na licu mjesta približnije stvori sliku i uvid u ono šta su nadležnosti MVP-a kao implementatora vanjske politike i onoga što je zakonom o Vijeću ministara BiH definirano da je nadležnost MVP-a.

Milorad Živković zahvalio se predstavnicima Ministarstva vanjskih poslova BiH i dodao da je za ovu temu ipak bilo potrebno da se ministar ili zamjenica ministra pojave na sjednici Komisije. Spomenuo je da je u prošlom sazivu Parlamenta bilo govora o platformi provođenja vanjske politike BiH koju je Predsjedništvo BiH dostavilo u Parlamentarnu skupštinu BiH. Dodao je da je tada bilo riječi o obrnutoj nadležnosti kada je u pitanju vođenje vanjske politike u BiH i da misli da se nastavilo s obrnutim načinom vođenja politike u BiH iz razloga što se u Predsjedništvu BiH ne mogu dogovoriti o osnovnim stvarima o vođenju politike pogotovo sa susjedima. Kazao je da ima utisak da je Ministarstvo vanjskih poslova BiH preuzelo sebi vanustavnu odredbu da samo kreira i vodi vanjsku politiku a ne da ispunjava politiku koja dolazi iz Predsjedništva BiH. Shodno tome kazao je da nije spreman da glasa za Izvještaj Ministarstva vanjskih poslova BiH u pozitivnom smislu i da smatra da MVP nije odgovorilo svom zadatku i ustavnim nadležnostima.

Azra Hadžiahmetović osvrnula se na dimenziju parlamentarne diplomatije kazavši da ne bi bilo loše da se u Ministarstvu vanjskih poslova BiH razmisli kako inkorporirati parlamentarnu diplomatiju u sve što bi moglo doprinijeti boljoj diplomatskoj aktivnosti BiH u svim segmentima. Kazala je da ekonomska diplomatija zaslužuje posebnu pažnju i da bi bilo dobro da se neke stvari iniciraju iz MVP-a i da se vidi šta se zajedno može uraditi u tom kontekstu. Dodala je da podržava izvještaj MVP-a, ali je kazala da smatra da mi nismo dobili Izvještaj o radu Vijeća ministara BiH nego Izvještaj za svako ministarstvo pojedinačno, te da se pridružuje općem stavu koji će biti prijedlog Zajedničke komisije za evropske PSBiH integracije u vezi sa Izvještajem Vijeća ministara BiH.

Sadik Ahmetović je u svom izlaganju kazao da, bez obzira što je imao dilemu kad je u pitanju sam koncept kako je postavljen ovaj Izvještaj, ne treba produbljivati i otvarati neke stvari koje nas mogu odvesti u nakom pravcu koji možda i nije u nadležnosti Vijeća ministara BiH već nekog drugog. Dodao je da bi Komisija trebalo da da pozitivno mišljenje o Izvještaju imajući u vidu da će nedostaci koje smo čuli biti otklonjeni zajedno s Komisijom za vanjske poslove. Naglasio je da bi u narednom periodu trebalo doći do određenih kontakata između Komisije za vanjske poslove i Ministarstva vanjskih poslova BiH.

Denis Bećirović je u raspravi podsjetio da smo mi u junu prošle godine potpisali Sporazum o stabilizaciji i pridruživanju i kazao da su očekivanja domaće javnosti i brojnih međunarodnih predstavnika bila da će BiH intenzivirati poslove potrebne da bi BiH što prije dobila kandidatski status za ulazak u Evropsku uniju. Međutim, u odnosu na očekivanja, dogodilo se nešto suprotno. Kada se napravi paralela šta je radilo cijelo Vijeće ministara BiH s onim što su radile vlade drugih zemalja, dođe se do zaključka da mi u svemu jako puno zaostajemo. Posebno zabrinjava činjenica da BiH nije realizirala niz obaveza koje su bile pred Bosnom i Hercegovinom, a da za to nema opravdanja, rekao je, uz ostalo, Denis Bećirović, te naglasio da će on kao poslanik SDP-a glasati protiv Izvještaja o radu Vijeća ministara BiH.

Husein Nanić rekao je da je vrlo teško da Komisija raspravlja o radu jednog ministarstva, jer kao poslanici nisu ni glasali za jednog ministra već za cijelo Vijeće ministara BiH. Izvještaj ovako pojedinačno ni tehnički nije dobro stavljen na raspravu. Šta bi to značilo kad bi mi kazali da odbijamo izvještaj jednog ministarstva, a radi se o raspravi o Izvještaju o radu Vijeća ministara BiH? Rekao je da je to pogrešan pristup. Ako se u Parlamentu bude glasalo pojedinačno o izvještaju jednog ministarstva, onda je to nešto drugo. Mi zato u Parlamentu i ne možemo glasati o Izvještaju o radu MVP-a. Možda bi izvještaji nekih ministarstava i pali jer su zaslužili da dobiju negativnu ocjenu, ali je to naprosto nemoguće. Zato je u ovome konfuzija u kojoj se ja ne mogu snaći, rekao je Husein Nanić. Naveo je da je nedavno bio na glavnom odboru Svjetskog saveza dijaspore u Štutgartu, te da je konzulat u Štutgartu ostavio na njega jako negativan utisak. S druge strane, posjetio je Predstavništvo Republike Srpske u Štutgartu i ima vrlo pozitivan utisak

o radu tog predstavništva. Ja ovo i ne bih dovodio u direktnu vezu sa Izvještajem o radu MVP-a, ali je moje iskustvo o ovom konzulatu veoma negativno, kazao je Husein Nanić.

Milica Marković kazala je da će ukratko govoriti o Izvještaju u kontekstu dopune, jer je ona prethodni put na Komisiji imala o tome širu raspravu. Kazala je da ne bi iznosila pojedinosti, ali da je i ona imala jako negativno iskustvo u Ambasadi BiH u Berlinu, prilikom nedavne posjete, ali da ima i pozitivnih primjera – npr. Ambasada u Parizu, Misija u Strazburu itd. U vezi s primjedbama koje je imala na prošloj raspravi koje su se odnosile na ekonomsku diplomatiju, na stanje u DKPBiH i na kadrovsko-tehničku organiziranost MVP-a, kazala je da se ponavljaju neke negativne tendencije u našim DKP-ima navodeći da ima još ambasada gdje nisu još ni imenovani ambasadori, kao u Beogradu. MVPBiH je morao preduzeti sve potrebne aktivnosti kako bi se došlo do imenovanja ambasadora. Njena generalna primjedba odnosila se na imidž BiH u svijetu, koji se nije popravio, a on je povezan i s ekonomskom diplomatijom. Te dvije stvari nisu ili nisu dovoljno urađene, naročito u kontekstu sve većih zahtjeva da BiH brže napreduje ka evroatlantskim integracijama i Evropskoj uniji. Svemu tome je sigurno doprinijelo i unutrašnje stanje u MVP i to uopće ne ide u prilog BiH, a nema nikakvih pokušaja da se te stvari anuliraju ili bar amortiziraju.

U ovoj 2009. godini bi ekonomska diplomatija, sređivanje odnosa u DKP mreži BiH i popravljjanje imidža BiH u kontekstu približavanja EU, morala da budu tri prioriteta na kojima Ministarstvo treba da radi, kazala je Milica Marković.

Slavko Matić rekao je da je i on u prvobitnoj raspravi imao određenih primjedbi i zamjerki na Izvještaj o radu i sam sadržaj Izvještaja. Zahvalio se Ministarstvu što se potrudilo da na veći dio primjedbi odgovori, ali da je samo djelimično zadovoljan odgovorom. Rekao je da ne želi ponavljati ono što su već rekli prethodni diskutanti, posebno Nanić i Marković, ali da i dalje misli da je vođenje kadrovske politike u MVP-u sa aspekta zastupljenosti hrvatskog naroda vrlo loše, s tendencijom pogoršavanja a ne poboljšavanja i adekvatnoj zastupljenosti predstavnika tog naroda na ključnim pozicijama, od nekakvih pomoćničkih do voditelja sektora, odjela i sl. Dio koji se tiče konzula i ambasadora je pri Predsjedništvu BiH i to nije želio komentirati. Ali ima dio gdje je MVP tehnički i operativno kreirao odluke Predsjedništvu BiH i one su bile pogrešne, po mišljenju Slavka Matića. To su one odluke o drugačijem ustankovljenju DKP mreže, gašenje nekih konzulata u Njemačkoj, otvaranje novih, gašenje jedine ambasade na jednom čitavom kontinentu, poput Južne Amerike i sl. I dalje misli da su to bile pogrešne odluke i u tome vidi krivicu MVP-a. I krivica je što BiH dugo nema ambasadora u Briselu. U vremenu kada nam treba svaki ambasador, posebno na takvom mjestu, ne smije se događati da takva mjesta stoje upražnjena mjesecima. Neprimjereno je i to da BiH ni dan danas nema ambasadora u Beogradu, što bitno narušava dobrosusjedske odnose, što bi trebalo biti važno i BiH i našim susjedima. Slavko Matić naglasio je da neće glasati protiv ovog izvještaja zato što pripada stranci koja je u parlamentarnoj većini, ali da ga ne može ni podržati.

Sead Avdić podržao je insistiranje poslanika da prilikom rasprave o ovako važnim dokumentima budu prisutni ministar ili njegova zamjenica. Sugerirao je da bi bilo , kad se radi o ovakvom dnevnom redu, ako je moguće, prije sjednice dogovoriti neki odgovarajući termin kako bi ministar ili njegova zamjenica mogli prisustvovati. Kazao je da je tačno da Ministarstvo obrađuje predmete i prijedloge, ali Predsjedništvo BiH imenuje ambasadore i konzule, i MVP na to uopće nema uticaja. Na primjedbe koje su iznijeli poslanici Husein Nanić i Milica Marković u vezi s konzulatima, rekao je da će se lično potruditi da se te pojave ispituju i da se vidi šta se tamo dešava, rekao je Sead Avdić, odgovarajući na diskusije o Izvještaju o radu Ministarstva vanjskih poslova BiH. U vezi sa ocjenom da pada imidž BiH, Sead Avdić rekao je da misli da ta ocjena ne stoji. Sporazum o stabilizaciji i pridruživanju sa EU jedan je od najvećih dometa na promociji BiH. Vodi se aktivna kampanja za prijem BiH u nestalno članstvo u Vijeću sigurnosti Ujedinjenih naroda. Naša

država dobila je jednoglasnu podršku zemalja istočne Evrope i ostala je jedini kandidat sa 69 potpisanih saglasnosti država, tako da bi trebali dostići broj od 128 do oktobra ove godine, kada će biti izbor na Generalnoj skupštini UN-a. To bi bio najveći domet nakon Dejtona, rekao je Sead Avdić, odgovarajući na diskusije članova Komisije o Izvještaju o radu Ministarstva vanjskih poslova BiH.

Poslije rasprave predsjedavajući Matić stavio je Izvještaj MVPBiH na glasanje.

Tri člana Komisije glasala su "za", dva "protiv", a tri člana bila su "suzdržana".

Prema rezultatima glasanja, Komisija je podržala Izvještaj o radu Ministarstva vanjskih poslova za 2008. godinu.

Ad. 6. Razmatranje Plana rada Ministarstva vanjskih poslova BiH za 2009. godinu

Predsjedavajući Matić rekao je da je Plan interni akt Ministarstva i Komisija ne bi trebalo da ga usvaja, jer se o tome treba izjasniti Vijeće ministara BiH. Rekao je da on smatra da je ovo Komisiji dostavljeno za informaciju, a Komisija može dati određene prijedloge i sugestije, koje su iznesene i u raspravi u prethodnoj tački. Rekao je da je dobro što je Ministarstvo dostavilo Komisiji ovaj plan " Strateški pravci za ekonomsku diplomatiju", jer se može dati poticaj za neka pitanja.

Nije bilo rasprave.

Predsjedavajući Matić konstatirao je da je Plan primljen k znanju i da, uz već rečene prijedloge i sugestije, pozivaju se članovi Komisije za vanjske poslove da, ukoliko imaju prijedloga i sugestija, da ih dostave Ministarstvu u narednih nekoliko dana.

Nakon ove tačke predsjedavajući je rekao da su sve preostale tačke informativnog karaktera, pa je pozvao članove Komisije da se prijave za raspravu o ovim materijalima. Pozvao je sekretara Komisije Merdžanu Iglicu da ako ima potrebe informira Komisiju o terminu posjeta Estoniji i Švicarskoj.

Merdžana Iglica upoznala je Komsiju s terminom posjeta Estoniji od 17.5. do 20. 5. 2009. i Švicarskoj od 28. do 30. 6. 2009. godine i zamolila članove Komisije da se opredijele ko bi išao u koju posjetu, s obzirom na stav Kolegija PDPSBiH da posjete budu ograničene na tri člana Komisije.

Ad. 7. Razmatranje informacije o međunarodnim ugovorima i sporazumima za ratificiranje u 2009. godini (materijal MVP-a BiH)

Članovi Komisije primili su k znanju informaciju o međunarodnim ugovorima i sporazumima za ratificiranje u 2009. godini.

Ad. 8. Izvještaji i materijali pristigli na Komisiju:

10. Zabilješka sa sastanka članova Zajedničke Komisije za evropske integracije PSBiH s Jelkom Kacinom, zastupnikom u Europskom parlamentu, u svojstvu izaslanika Hansa Gerta Potteringa;

11. Informacije o raspravi o BiH na sastanku Vijeća EU za opće poslove i vanjske odnose, 16.3.2009., u Briselu (sačinilo MVPBiH)

- 1. Pismo Solana – Rehn ministrima vanjskih poslova EU, od 13.3. 2009.;**
- 2. Zajednička akcija Vijeća EU o imenovanju EUSR-a u BiH;**

- Izvještaj o posjeti ministra vanjskih poslova BiH Svena Alkalaja Alžiru (sačinilo MVPBiH);
- Zajednički prijedlozi učesnika Okruglog stola: "Poboljšanje poštivanja vojno-političkih obveza BiH u okviru UN-a i OSCE-a (materijal Misije OSCE-a u BiH);
- Pismo ministra vanjskih poslova BiH Svena Alkalaja predsjedniku Narodne skupštine Republike Srpske Igoru Radojiću.

Denis Bećirović je u vezi s Pismom ministra vanjskih poslova BiH predsjedniku Narodne skupštine RS-a rekao da je bilo prilike da se i ranije čuje o ovakvim aktivnostima. Rekao je da je jasno da su vanjskopolitičke aktivnosti isključiva nadležnost BiH, te da on ovo pitanje veoma ozbiljno posmatra, pa je predložio da Komisija usvoji sljedeći zaključak - **da se zatraži od MVPBiH zvanična informacija o vanjskopolitičkim aktivnostima institucija RS-a u posljednje dvije godine, što je, sa pet glasova "za" i jednim "protiv", i usvojeno.**

Sadik Ahmetović govorio je u vezi sa zajedničkim prijedlozima učesnika Okruglog stola "Poboljšanje poštivanja vojno-političkih obveza BiH u okviru UN-a i OSCE-a (materijal Misije OSCE-a u BiH) i dao prijedlog da Komisija podrži **zajedničke prijedloge nastale u okviru Okruglog stola „Poboljšanje poštivanja vojno-političkih obaveza BiH u okviru UN-a i OSCE-a“.**

Komisija je jednoglasno podržala ovaj zaključak.

Slavko Matić se na kraju zahvalio članovima Komisije.

Sjednica je završena u 13,40 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući

Slavko Matić

Kopija MVP-u BiH